

廿二史考異

魏書二

廿二史攷異廿九

錢大昕學

天象志三

皇始二年六月庚戌月掩金于端門外 此卽前卷所

書月掩太白事占驗亦略同蓋魏收志第三第四卷
闕失後人以張太素書補之太素天文志祇有兩卷
凡月與五星變異但依年代順敘不復區別與魏收
志體例各殊故此卷月掩犯多與前兩卷重出

由是魏爲北帝而晉氏爲南帝 按太素唐人故於南
北朝無偏黨之詞其書蕭衍起兵襄陽推南康王寶

融爲帝則稱東昏爲東主和帝爲西君其書東西魏
事則云由是分爲二國又云東西帝割據山河又云
梁魏三帝皆大赦改元非若魏收之黨於鄴都魏澹
之黨於關西也

明年齊將陳達伐我南鄆陷澧陽 澧陽本紀作醴陽
陳達卽陳顥達也當是唐人避諱去顥字

天象志四

是時勃海王歡起兵信都 魏收史稱高歡爲齊獻武
王此志前書渤海王歡後書大丞相歡

地形志上

今錄武定之世以爲志焉 按伯起志州郡不述太和
全盛之規轉錄武定分裂之制至秦雍以西不在東
魏疆域之內乃據永熙綰籍以足之未免自亂其例
矣

魏尹 貴鄉天平二年分館陶置治趙城有東中郎將
治 按孝靜帝紀天平元年初置四中郎將於礪石
橋置東中葢卽貴鄉縣地

東郡秦置治滑臺城 按志載州郡所治皆舉城名而
不言其縣故攷證爲難今略言其可知者滑臺城卽
東郡之白馬縣也晉州治白馬城則平陽之禽昌縣

也

太平寰宇記後魏擒赫連昌於白馬城置禽昌縣

濮陽郡

城陽二漢晉屬濟陰

城當作成

常山郡

孝章建初中爲淮陽永元二年復按後漢

無改常山爲淮陽之事此魏收之誤卷末攷證一條

已詳言之蓋宋館閣諸臣劉攽范祖禹輩所駁正也

鉅鹿郡

橐城有肥壘

按漢志真定有肥壘縣晉以

後蓋省入橐城當云有肥壘城後人轉寫作壘又脫

城字誤以爲壘壁之壘矣

鄴二漢晉屬有鄴城

鄴不成字當作鄴說文鄴鉅鹿

縣从邑臬聲漢志作鄴與臬文異而音義同

渤海郡 脩前漢晉屬號脩後改 脩與漢晉無異文
何以云改據列傳高氏封氏皆稱渤海菴人乃知晉
以前本作脩後魏改從艸耳上脩字當作脩

武邑郡 灌津前漢屬信都 漢書灌作觀

北五城郡 五城之五隋志皆作伍五城定陽本汾州
屬郡孝昌中寄治西河并移西河郡於平陽界興和
中又析置北五城定陽郡皆在隋之臨汾縣地

汾州延和二年爲鎮太和十二年置州治蒲子城 按
穆羆傳高祖時爲吐京鎮將後改吐京鎮爲州仍以
羆爲刺史然則魏初本爲吐京鎮蒲子城卽吐京鎮

也汾州之治西河自裴良始

吐京郡真君九年置 按水經注吐京郡治卽土軍縣之故城也漢西河郡有土軍縣字隨聲而譌

東雍州世祖置太和中罷天平初復 按前晉州平陽郡下云真君四年置東雍州太和十八年罷然則世祖所置之東雍州在平陽此天平復置之東雍州乃在邵郡各雖同而地實異矣

安州皇興二年置治方城天平中陷元象中寄治幽州北界 按通鑑梁普通七年魏安州石離穴城斛鹽三戍兵反應杜洛周衆合二萬洛周自松岍赴之卽

魏孝昌二年也則安州之陷似當在孝昌中與燕營
二州之陷同時矣今攷江文遙傳稱文遙爲安州刺
史善於綏撫甚得物情時杜洛周葛榮等相繼叛逆
幽燕已南悉沒唯文遙孤城獨守百姓皆樂爲用卒
官長史許思祖等復推其子果行州事遣使奉表莊
帝嘉之旣而賊勢轉盛救援不接乃攜諸弟并率城
人東奔高麗天平中詔高麗送果等蓋至是始聞安
州之陷故志系之天平中也其後招其遺民寄治幽
部故地廼近庫莫奚遂爲國脫矣

密雲郡治提攜城 按漢志漁陽郡有庠奚縣孟康讀

庠爲題卽此提攜也此云郡治提攜城而白檀縣下
又云郡治則白檀卽提攜城矣漢時白檀庠奚本是
兩縣蓋後來省庠奚入白檀縣又移縣治于故庠奚
城也

廣陽郡 燕樂州郡治 按上文云安州治方城而此
燕樂爲州郡治則燕樂城亦卽方城矣而普泰元年
又別置方城縣蓋孝昌淪陷之後僑立此縣非卽燕
樂故地也

南汾州 按南汾州領北吐京西五城南吐京西定陽
定陽北鄉五城中陽龍門九郡志不言何時置又不

言治何城或隋志文城郡東魏置南汾州其首縣曰
吉昌後魏爲定陽縣并置定陽郡則南汾州當治定
陽城矣卽今吉州此志有定陽郡而無定陽縣所未詳也
孝莊紀永安三年以元顥恭都督晉建南汾三州諸
軍事晉州刺史則南汾之置當亦在永安初矣

南營州孝昌中營州陷永熙二年置寄治英雄城按
英雄城未詳所在隋志上谷郡遂城縣舊曰武遂後
魏置南營州則英雄城卽遂城也但後魏上谷郡無
武遂縣惟冀州武邑郡有之本漢縣屬河間後漢晉
屬安平後齊廢縣入武彊與上谷之武遂似非一地

東燕州太和中分恒州東部置燕州孝昌中陷以穆
黑傳攷之燕州蓋治廣甯也

天平中領流民置寄治幽州宣都城按幽州無宣都
城一本作宜都亦誤當是軍都之譌隋志涿郡昌平
縣舊置東燕州攷兩漢及晉軍都昌平各自爲縣後
魏軍都縣有昌平城則已并昌平於軍都隋又改軍
都爲昌平也

建德郡真君八年置治白狼城按世祖紀延和元年
車駕至和龍馮文通石城太守李崇建德太守王融
十餘郡來降則建德郡後燕已有之魏特因其故名

耳志無石城郡蓋并入建德矣

營邱郡正光末置 按世祖紀延和元年徙營邱成周
遼東樂浪帶方元菟六郡民三萬家於幽州開倉以
賑之是營邱郡後燕所置而志以爲正光末置者世
祖滅燕之後營邱成周帶方元菟諸郡皆已併省正
光末又復置耳

蔚州永安中改懷荒禦夷二鎮置 按六鎮改州魏收
史言之不詳惟懷朔爲朔州禦夷懷荒爲蔚州薄骨
律爲靈州見於本志

廓州武定元年置治肆州敷城界廓城

一本作郭城

按隋

志雁門郡崞縣後魏置曰石城東魏置廓州有廣安
永定建安三郡寄山城與此志云治敷城似不合
攷城石城俱肆州秀容郡之屬縣蓋隋時并敷城入
石城因附書於下也

武州武定元年置治雁門川武定三年始立州城按
隋志雁門郡繁峙縣後魏置并置繁峙郡有東魏武
州及吐京齊新安三郡寄在城中此志之雁門川卽
繁峙郡且寄治郡城非別立州城也

地形志中

兗州後漢治山陽昌邑魏晉治廩丘今本脫廩字

劉義隆治瑕邱 漢山陽郡有瑕邱縣劉宋元魏皆以
瑕邱爲兗州治所而不置瑕邱縣至隋始復置焉卽
今滋陽縣也

青州司馬德宗治東陽城魏因之 東陽城卽今益都
縣

廣川郡劉裕置魏因之領縣三武強索盧中水 此齊
州之廣川郡卽隋長山縣地非冀州之廣川也

太原郡劉義隆置 宋志文帝元嘉十年割濟南太山
立隋志長清縣有東太原郡卽此郡也劉宋嘗置并
州於此房法壽傳劉或以房崇吉爲并州刺史領太

原太守治升城

太原司馬德宗置魏因之治升城有靡溝垣城 當云垣苗城史脫苗字慕容白曜傳既至升城垣苗麋溝二戌拒守不下是二城距升城不遠也麋靡音相近潁川郡長社 按南史魯爽傳宋武帝定長安魯軌奔魏魏以軌爲荊州刺史鎮長社軌歿爽代爲荊州刺史鎮長社是魏初嘗置荊州於此志亦失書

濟州治濟北碯磈城泰常八年置 今長清縣西北有廢碯磈城

平原郡武泰中立南冀州永安中罷州 按南冀州分

冀州之清河相州之陽平濟州之平原置以路思令
爲刺史永安中葛榮滅而州亦省也

南清河郡晉泰寧中分平原置治莒城 按晉世紀元
有太寧而無泰寧攻房亮傳晉泰中濟州刺史張瓊
表所部置南清河郡乃知晉字本普字之譌又衍一
寧字耳

東濟北郡孝昌三年置 按鄭輯之孝靜初除東濟北
太守帶肥城戍主則郡治肥城也

光州治掖城皇興四年分青州置延興五年改爲鎮景
明元年復 按呂豹子爲東萊鎮將後改鎮爲州行

光州事是光州未復之時爲東萊鎮也

東牟郡孝昌四年分東郡陳留置治雍邱 孝昌以下

十三字當在陽夏郡下誤重出於此

梁州治大梁城 大梁城卽浚儀城也

汝南郡 上蔡州郡治 上蔡城卽懸瓠城

義陽郡永安三年置郢州天平四年罷州置 此義陽

非梁之司州蓋孝昌末卽梁大
通二年郢州刺史元願達以

義陽叛入於梁乃僞立郢州及義陽郡於豫州界卽

隋眞陽縣地隋志眞陽縣舊置郢州東魏廢州置義

陽郡卽此

新蔡郡晉置孝昌中陷後復治石母臺 按太平寰宇

記石母臺在平輿縣西北五十步

城陽郡太和三年置後罷武定初復 按韋珍傳破崔

慧景擁降民七千餘戶內徙表置城陽剛陵義陽三
郡以處之卽太和三年置城陽郡事也剛陵義陽二
郡當與城陽俱罷故志不及之天平四年所置之義
陽與韋珍表置之義陽非一地故志不言復置也

廣陵郡興和中分東豫州置 按魏之東豫州本治廣

陵城孝昌三年州沒于梁故興和中別置廣陵郡以
招撫流民志云分東豫置不知興和之世東豫已不

攷異

劉書二

九

屬魏矣

南陽平郡治沛南界後寄治彭城 按薛曇尙熙平二年除徐州穀陽戍主行南陽平郡事則穀陽爲南陽平治所卽沛南界矣隋志云彭城郡之穀陽縣後齊置穀陽郡此卽舊南陽平郡所治又云彭城縣後周并沛及南陽平二郡入則据後來寄治而言

南兖州正光中置治譙城 據范紹傳蓋析徐豫二州置

陳留郡 小黃劉裕置魏因之有曹騰墓曹嵩墓鄧艾祠 此陳留郡僑置於譙郡故小黃有曹氏墓沒饒

有城父城谷陽有老子廟若梁州之陳留則漢舊郡也

馬頭郡司馬德宗置魏因之正光中陷天平中復治建

平城按漢沛郡有建平縣章懷太子云建平故城

在今亳州鄆縣西北一名馬頭城

後漢書錢明傳注

卽此馬

頭郡也魏時淮南北皆有馬頭郡此南兖州之馬頭

領蕲已吾下邑三縣在淮北又楚州

治鍾離

亦有馬頭

郡領蕲平預二縣在淮南今懷遠縣西南有馬頭城

是也

膠州永安二年置治東武陵

陵當是城字之譌

南青州治國城顯祖置爲東徐州太和二十二年改

國城通鑑作圉城胡三省云國城當在唐沂州沂水縣界國戶困鬻予按高閭傳以本官領東徐州刺史與張謏對鎮團城劉休賓傳亦云東徐州刺史張謏所戍團城領二郡則國城當爲團城之譌或作圉城亦誤

北徐州永安二年置 此州不言治所按隋志琅邪郡舊置北徐州蓋治琅邪之卽邱矣

東楚州司馬德宗置宿豫郡高祖初立東徐州後陷世宗初改爲鎮後陷武定七年復改爲宿豫郡 按隋

志宿豫郡後魏置南徐州梁改爲東徐州東魏又改曰東楚州與此志異攷皇興元年宿豫始入於魏正始三年梁將張惠紹拔宿豫仍不能守永平元年成景雋殺宿豫戍主以城降梁自是不隸魏者四十餘年及侯景之亂始歸東魏乃有東楚州之名

高平郡治大徐城 按杜顥傳正光中遷盱眙太守帶大徐戍主疑卽此大徐也大徐城隋爲徐城縣今泗州地也

朱沛武定七年改蕭衍朱沛修儀安豐三郡置 修儀隋志作循儀

東豫州太和十九年置治廣陵城孝昌三年陷武定八年復按廣陵城今光州息縣地攷田益宗傳太和十七年奉表歸款十九年拜都督光城弋陽汝南新蔡宋安五郡諸軍事南司州刺史後以益宗旣渡淮北不可仍爲司州乃於新蔡立東豫州以益宗爲刺史是廣陵城卽新蔡地矣梁大通元年卽魏孝昌三年譙州刺史湛僧智圖魏東豫州刺史元慶和于廣陵慶和舉城降以僧智領東豫州刺史自是廣陵屬梁又改爲西豫州太清元年以北廣陵爲淮州卽此廣陵也又二年有侯景之亂而廣陵又入於魏此志所云武

定七年復正其時也

義州蕭衍置武定七年內屬 此州不言治所亦無所
領郡縣隋志羅田縣梁置義州義城郡當卽此通鑑
梁普通二年義州刺史文僧明擁所部降魏魏以爲
西豫州刺史胡三省謂此義州當置於齊安郡木蘭
縣界蓋以意度之未及檢隋志也

汝陰弋陽二郡蕭衍置雙頭郡魏因之 雙頭郡者兩
郡同治一人帶兩郡守也此本汝陰郡地又僑立弋
陽郡宋志所謂帖治

北陳留潁川二郡蕭衍爲陳州武定七年改置 隋志

汝陰郡潁陽縣梁曰陳留并置陳留郡及陳州東魏廢州卽此陳州也本雙頭郡隋志止舉陳留而不及帖治之郡他皆類此

譙州景明中置渦陽郡孝昌中陷武定七年復置州治渦陽城 按渦陽隋爲山桑縣今之蒙城縣也隋志云後魏置渦州梁改西徐州東魏改譙州此志無置渦州之文又孟表爲蕭鸞馬頭太守太和十八年據郡歸誠除南兖州刺史領馬頭太守鎮渦陽則太和中嘗置南兖于渦陽而志亦未之及也

伊陽郡武定二年置治伏流城後陷寄治州城 按隋

志河南郡陸渾縣東魏置伊川郡領南陸渾縣開皇
初廢郡改縣曰伏流是伏流城卽南陸渾縣也彼志
云伊川郡此云伊陽未審孰是州城不知所在據隋
志陸渾縣又有東魏北荊州則州城距伏流當亦不
遠

南司州劉彧置司州正始元年改爲郢州孝昌三年陷
蕭衍又改爲司州武定七年復改置此宋齊梁之
司州魏正始初始得之改爲郢州其後又入於梁梁
末喪亂復爲東魏所得乃仍司州之名鄴中已有司
州故此加南字若梁之南司州治安陸與此初不相

涉

齊安郡 保城劉駿置魏因之 宋志作寶城

鄆有石城山 漢晉宋志皆作鄆

鍾離陳留二郡 灌邱有郡陽城 郡陽當是邵陽之

譌

汝陰郡州治 州治卽合肥城也宋志南汝陰郡汝陰
縣所治卽二漢晉合肥縣

南陳郡州治 此志以南陳郡爲霍州治而隋志於霍
山縣下云梁置霍州及岳安郡岳安縣豈南陳郡後
亦併入霍山乎

睢州蕭衍置潼州武定元年平改置治取慮城 元年
監本作九年攷武定紀元止于八年則以爲九年者
誤矣據下文淮陽穀陽睢南臨潼諸郡俱云六年置
則睢州之置亦當在六年字形相涉誤爲元爾取慮
城在今虹縣北

南定州蕭衍置魏因之治蒙籠城 按南史梁安成王
秀傳司州叛蠻田魯生魯賢超秀據蒙籠來降武帝
以魯生爲北司州刺史魯賢北豫州刺史超秀定州
刺史是梁時但稱定州至魏始加南字以別於中山
之定州也今麻城縣西有故蒙籠城州所領郡五而

弋陽郡爲州治隋志于麻城縣下云陳置定州不知梁與東魏已有之又不言曾立弋陽郡皆其疏也

西楚州蕭衍置魏因之治楚城 按隋志汝南郡城陽縣後魏置城陽郡梁置楚州東魏置西楚州州蓋以楚王城得名今息縣西有成陽廢縣一名楚子城孝靜紀天平三年侯景攻克楚州獲刺史桓和卽此州也

仵城郡蕭衍置魏因之 隋志城陽縣有梁置伍城郡卽此仵城也五與午古字通

西淮州蕭衍置魏因之治豫州界白狗堆 按隋志真

陽縣又有白狗縣梁置淮州後齊廢州以置齊興郡
郡尋廢開皇初改縣曰淮川卽此淮州也淮陰有淮
州故此加西字州領淮川一郡真陽梁興二縣而淮
川爲州治故隋改縣爲淮川而真陽名縣亦因乎此
譙州蕭衍置魏因之治新昌城 此淮南之譙州所謂
南譙州也隋志清流縣舊曰頓邱置新昌郡及南譙
州開皇初改爲滁州卽此

臨徐郡治葛城 徐當作滁

梁郡州治 宋志南梁郡睢陽縣所治卽二漢吾壽春
縣

淮州蕭衍置魏因之治淮陰城 隋志山陽縣有後魏

淮陰郡卽此

仁州蕭衍置魏因之治赤坎城 此州唯領臨淮一郡

志以已吾縣爲州郡治則已吾卽赤坎城矣隋志彭
城郡之穀陽縣舊有已吾義城二縣後齊併以爲臨
淮縣然則梁所治仁州卽隋穀陽縣也太平寰宇記
赤坎故城在虹縣西南一百九十五里梁天監八年
置赤坎戍大同二年廢戍置仁州

九州蕭衍置魏因之治光城 此志州名相同者有兩

光州一治掖城一治光城有兩秦州一治上封一治

蒲坂

辯見後

有兩譙州一治渦陽一治新昌有兩義州

一寄治汲郡一不言治所有兩洛州一治洛陽一治

上洛有兩梁州一治大梁一治南鄭有兩南郢州一

治赤石關一領北遂安馮翊江夏等郡不言治所

南朔州蕭衍置魏因之治齊坂城 此州未審所在州

領梁新蔡邊城義陽新城黃川六郡攷隋志光山縣

有舊黃川郡蓋卽朔州所領之黃川矣梁無北朔州

此南字魏所加

南建州蕭衍置魏因之治高平城 按隋志殷城縣梁

置義城郡及建州并所領平高

當作高平

新蔡新城三郡

卽此南建州也梁時本稱建州南字蓋東魏所加以別於高都之建州也據此志新城郡乃南朔州所領不隸於南建蓋隋志之誤然卽此可證朔建二州相距不遠也

南郢州蕭衍置魏因之治赤石關按州所領有定城邊城光城三郡隋志定城縣後齊置南郢州武定八年卽齊天保元年故隋志以爲後齊置據此志則南郢之名實始于梁也

沙州蕭衍置魏因之治白沙關城此州未審所在今光山縣西南有白沙關與麻城縣界疑卽梁所置沙

川也隋志麻城縣有建寧郡蓋卽沙州所領之建寧

郡

蕭衍傳景明四年衍將吳子陽亮白沙中山王英大破之

北江州蕭衍置魏因之治鹿城關湘州蕭衍置魏因之

治大治關城

按隋志木蘭縣梁置梁安郡又有永

安義陽二郡後齊置湘州後改爲北江州則湘與北

江卽一州而更名據此志北江州領義陽齊昌新昌

梁安光城齊興六郡而義陽之義陽縣爲州郡治湘

州領安蠻梁寧永安三郡而安蠻之新化縣爲州郡

治則明係兩州不可混而爲一蓋梁時本是二州魏

末因梁舊亦分湘北江爲二迨後齊并省州郡以北

江入湘又移北江之名於湘爾

汴州蕭衍置魏因之治汴城此州未審所在州領沛

汲古閣本作汴

臨淮二郡沛郡領蕭潁川相三縣攷隋志梁

郡虞城縣後魏曰蕭後齊廢又後魏置沛郡後齊廢疑卽梁時所置汴州也

魏書二

魏書三

廿二史攷異三十

錢大昕學

地形志下

雍州 此卷所載三十三州皆西魏疆域不在東魏版圖之內故皆無戶口實數

京兆郡山北 此縣姚興所置見太平寰宇記

陰槃二漢屬安定晉屬寰宇記昭應縣東十二里故城卽漢新豐縣後漢靈帝末移安定郡陰盤寄理於此則京兆之陰槃與安定之陰槃非一地

咸陽郡 寰宇記苻堅於今縣東北長陵城置咸陽郡

後魏太和二十年移咸陽郡於涇水北今涇陽縣也
南岐州 志不言所治以隋志攷之當治固道郡之梁
泉縣永熙中有南岐州刺史盧侍伯武定中有南岐
州刺史堯難宗

廣業郡 按南岐州領三郡志唯於固道郡云延興四
年置餘皆闕之攷皮豹子傳子喜高祖初拜都督秦
雍荆梁益五州諸軍事仇池鎮將酋帥强奴子等各
率戶歸附于是置廣業固道二郡以居之則廣業郡
亦延興中置矣

槃頭郡 隋志作盤頭

洛聚郡 隋志作落叢

益州正始中置 按魏未得蜀地置益州於晉壽所謂小益州也

巴州郡縣闕 此州不載所治及建立之年按正始二年邢巒請於巴西立巴州事未及行其後竟以嚴始欣爲巴州刺史蓋在正始永平之間

梁州蕭衍梁秦二州正始初改置 宋齊以後梁秦二州刺史常以一人領之以南鄭爲治所正始二年梁將夏侯道遷據南鄭入魏魏始立梁州其治所蓋仍在南鄭也

南梁州郡縣闕

此州不載所治及建立之年攷通鑑

梁中大通元年

卽魏永安元年

魏子建奏以隆城鎮爲南梁

州胡三省以爲卽閬中城未知然否

東梁州

此州亦不載建立之年據淳于誕傳及寰宇

記蓋置於孝昌三年其治所當在安康也

隨平郡

隋志作趙平

鵠鵠前漢屬山城

鵠當作觚山城當作北地

河州有伏乾

諸本乾下闕二字按乞伏國仁嘗自稱

河州牧當云乞伏乾歸置有蓋乞之謬

渭州

志失書置州之前廢帝紀有渭州刺史侯莫

陳悅其治所當在隴西襄武縣

南安陽郡

此陽字疑衍隋志隴西縣舊曰內陶

卽中陶

置南安郡

高平郡領縣二高平里亭

按隋志平高縣後魏置太

平郡後改爲平高周書李穆除原州刺史又以賢子爲平高郡守遠子爲平高縣令叔姪三人皆牧宰鄉里然則此郡縣名皆當爲平高而上文原州治高平城亦當爲平高也

鄯州郡縣闕

鄯州卽舊西平郡孝莊時有鄯州刺史

侯莫陳悅

瓜州郡縣圖

瓜州卽故敦煌地孝莊紀有瓜州刺史

元太榮又高昌王世子光亦爲瓜州刺史

華州太和十一年分秦州之華山澄城白水置

刊本華山作山

山

誤此州不言治所以安定王燮傳攷之蓋初治李

潤堡世宗時移治古馮翊城也

秦州

此秦州不言治所以水經注攷之蓋治蒲坂也

攷志中州名相同者多加東西南北以別之太和改洛爲司因以上洛爲洛天平以大梁爲梁其時南鄭之梁已失非同時有兩洛州兩梁州也惟光義譙南郢係武定新附之州沿蕭梁舊名未及更正故有重

複耳獨兩秦州並置者六十餘年何以不議改易且
延和元年改雍州爲秦州其時赫連定甫平秦州初
入版圖豈有復置秦州之理予積疑者數載後讀食
貨志稱并肆汾建晉泰陝東雍南汾九州靈徵志天
平四年秦州并溢太和二年秦州獻五色狗薛辯傳
贈都督冀定秦三州諸軍事

源古開本
秦作太

出帝紀秦州

刺史万俟普撥又齊書莫多婁貸文傳仍爲汾陝東
雍晉泰五州大都督周書薛端傳高祖謚秦州刺史
侯植傳父欣秦州刺史史言秦州者多矣而地形志
無之乃悟蒲坂之秦州當爲秦州之譌字形相涉讀

史者不能是正非一日矣

陝州太和十一年置治陝城八年罷 當云十八年罷
蓋遷洛之後以畿內罷州也

恒農郡 北陝後漢晉曰陝有曲沃城 此非桓叔始
封之曲沃水經注云春秋文公十三年晉侯使詹嘉
守桃林之塞處此以備秦時以曲沃之官守之故曲
沃之名遂爲積久之傳矣

洛州太延五年置荊州太和十一年改 當在太和十
八年字誤

荊州太和中治穰城 按上卷魯陽郡云太和十八年

改爲荊州二十二年罷置然則太和十八年以前荊州仍治上洛及遷都洛陽移洛州於上洛而荊州徙治魯陽二十二年克南陽始遷荊州于穰城則在太和末年矣此云太和中治穰城尙脫改治魯陽一節合前後文攷之方得其實

襄城郡 方城有赭陽城 按襄州之襄城郡云蕭道成置魏因之治赭陽城其所領方城郟城伏城舞陰翼陽赭城六縣亦與此同疑孝昌中析荊州置襄州其實一地也

北清郡 清當作清肅宗紀北清懸危南陽告急楊大

眼傳出爲荊州刺史北清郡嘗有虎害大眼搏而獲之

恒農郡 國 國當作園字之譌也宋志雍州之恒農郡寄治五塋領郿鄠盧氏三縣

襄州孝昌中置 按隋志潁川郡之葉縣後齊置襄州據此志則襄州之置不始於後齊矣州治赭陽城今裕州地

南安郡太和十三年置郢州十八年改爲南中府天平初罷府置後陷 按隋志葉縣有東魏置定南郡據此志則東魏所置本名南安郡領南安南舞葉南定

四縣初無定南郡也二志未審誰是魏收仕於東魏

其述東魏郡縣當得其實

南安縣一本作安南

南襄州

此志不言治所隋志春陵郡之湖陽縣後魏

置西淮安郡及南襄州當卽此唐并湖陽入棗陽

西淮郡

隋志作西淮安郡

南廣州

按隋志不見南廣州之名孝莊紀有南廣州

刺史鄭先護周本紀魏廢帝三年改南廣爲清州

郢州

按魏以梁之司州

卽義陽

爲郢州此州蓋孝昌中

義陽淪沒之後僞置者隋志眞陽縣舊置郢州東魏

廢州置義陽郡卽此郢州也縣又有後魏安陽縣卽

此州所領之安陽郡也

南郢州 此州未詳何年建立攷韋朮爲荊郢和羅大
使南郢州刺史在肅宗朝而孝武時有南郢州刺史
史寧西魏有南郢州刺史耿令貴韋瑱此州之置當
在正光孝昌以前矣周本紀魏廢帝三年改南郢爲
歸州周武帝天和二年省歸州入唐州其地當在今
隨州西北

江夏郡領縣二屈陽郢陽 按隋志淮安郡慈邱縣後
魏曰江夏并置江夏郡蓋卽南郢州之江夏郡也

永安郡 按南郢州所領十二郡今刊本殘闕失其二

又有兩永安郡所領縣各不同而不加東西南北以別之六朝郡縣僞置雖多重複然一州領郡若干未有同名者獨南廣州有兩襄城與此兩永安皆可疑也

析州 按隋志浙陽郡西魏置浙州卽此後人加水旁耳據此志則後魏已有之不始於西魏矣西魏所置州郡非魏收史所當書也攷周書泉企傳以破蕭寶寅功遷左將軍浙州刺史則浙州之置當在永安初矣

脩陽郡 按孝武帝名脩而此有脩陽郡脩陽縣蓋此

州及所領郡縣皆置於孝武以前魏收仕於東魏以孝武播遷失國不以君禮待之故不爲諱也宋志順陽郡永初郡國有朝陽武當鄧陰沔陽筑析脩陽八縣則脩陽郡蓋析順陽置也

水經注浙水逕脩陽縣故城北縣卽浙之北鄉也

析陽郡 按北史韋孝寬傳普泰中從荊州刺史源子恭鎮穰城以功除淅陽郡守時獨孤信爲新野郡守同隸荊州是普泰之世析陽又隸荊州蓋魏末分爭州郡之隸屬無常史家不能悉紀也

律歷志上

世祖平涼土得趙歐所修元始歷後謂爲審以代景初
按魏收志不載元始術唐一行大衍議言元始術
氣分二千四百四十三又言元始術因劉洪紀法增
十一年以爲章歲而減閏餘十九分之七然則元始
術章歲六百章閏二百廿一章月七千四百二十一
也

歲中十三年一十二次 當云歲中十二年一十二
次誤并二一爲三字

推合又交會月蝕去交度 按正光術凡七篇推月朔
術第一推二十四氣術第二推合朔入歷遲疾盈縮

第四推日月合朔弦望度術第五五行沒滅易卦氣
候上朔術第六推五星六通術第七獨不見第三益
推合朔交會去交度以下本別爲一篇當云推交會
術第三列于此行之前轉寫遺脫爾

加法得一爲少 加當作如

以定并少爲半彊 定當作之

禮志二

淹中之經孔安所得唯有卿大夫士饋食之篇而天子
諸侯享廟之祭禘祫之禮盡亡 按漢藝文志云禮
古經者出於魯淹中及孔氏與十七篇文相似多三

十九篇及明堂陰陽王史氏記所見多天子諸侯卿大夫之制雖不能備猶脩倉等推士禮而致於天子之說蓋禮古經本五十六篇較之高堂生所傳十七篇實多三十九篇今孫惠蔚謂孔氏所得唯有卿大夫士饋食之篇則誤以高堂生所傳十七篇爲孔安國所得矣六朝文詞唯取偶儷往往割截名字以足句此稱孔安國爲孔安亦其類也

禮志四

傳重者主宗廟非謂庶人祭于寢也兼累世承嫡方得爲嫡子嫡孫耳不爾者不得繼祖也 按嫡孫持重

之服主有宗廟者而言劉芳之議自不可易今庶人
無爵而以孫上陵諸父非禮意也

惟周之士不顯奕世 此許叔重所引奕字較亦義爲
長

樂志

湯武所以 此下闕一策

食貨志

其司冀雍華定相秦洛豫懷兗陝徐青齊濟南豫東兗
東徐十九州 此時司州治平城洛州治洛陽豫州
治虎牢則懸瓠爲南豫矣兗州治滑臺則瑕邱爲東

兖矣東徐州卽南青州穆亮都督豫洛南北豫徐兖六州諸軍事謂虎牢與懸瓠也

幽平并肆岐涇荆涼梁汾秦安營幽夏光郢東秦 此

時荊州治上洛東秦州治杏城

卽北華州

梁州蓋治洛谷

郢州未詳所治地形志南安郡太和十三年置郢州十八年改爲南中府者是也其地當在今葉縣

司州萬年厓門上谷靈邱廣甯平涼郡 魏初都平城

置司州其所領郡縣魏收志皆闕而不書今據此志知萬年等六郡當時皆隸司州又皇興中置平齊郡于平城西北當亦隸司州也

懷州邵郡上郡之長平白水縣 按地形志皇興四年
置邵上郡太和中併河內孝昌中改邵郡此文當云
邵上郡誤多一郡字長平地形志作萇平邵上郡本
屬懷州地形志亦未載

青州北海郡之膠東縣平昌郡之東武平昌縣高密郡
之昌安高密夷安黔陬縣 按地形志平昌高密二
郡皆屬膠州膠州置於永安二年太和之世尙未立
膠州也地形志東武平昌二縣屬高密郡昌安屬平
昌郡與此志亦異

秦州河東之蒲坂汾陰縣 按地形志汾陰屬北鄉郡

不屬河東

北地郡之三原雲陽銅官宜君縣 按地形志北地郡
無三原縣

徐州北濟郡之離狐豐縣東海郡之嶺榆襄賁縣 當
作北濟陰郡志脫陰字地形志東海郡屬海州襄賁
別屬海西郡亦隸海州

靈徵志上

桓州刺史穆泰等 桓當作恒

司州之河北河東正平平陽 按孝文遷洛以洛陽爲
司州其所領郡縣不載於地形志今據此志州所領

有河南河北河東正平平陽潁川潁恒農滎陽

永平三年南秦州廣業仇池郡大風 按地形志南秦

州無廣業郡南岐東益二州皆有之

太和三年雍朔二州大霜 按地形志朔州本秦五原

郡延和二年置爲鎮後改爲懷朔孝昌中改爲州是

太和以前未有朔州而此志太和中屢見朔州蓋卽

雲州也地形志雲州舊置朔州

太和八年冀州相三州野妨害稼 冀州之州字誤

靈徵志下

景明二年秦州上言南稻新興二縣木連理各一 按

地形志未見此二縣

釋老志

有仙人成公興不知何許人 按殷紹上四序堪輿表
云臣以姚氏之世行學伊川遇遊遁大儒成公興從
學九章算術興字廣明自云膠東人也蓋卽其人

目錄序

故房延祐辛元植荏仲刁柔裴昂之高孝幹皆不工纂
述 按序傳及收上十志啟俱無陸仲名

其書亡逸不完者無慮三十卷 今據刊本目錄闕者

本紀第三

明元帝

第十二

孝壽帝

列傳第一

后

第二

神元

子孫第三昭成第五明元第六太武第七上景穆第十

八文成第十五孝文第十三長孫第廿二王洛第六十

九綦儁第七十李瑛第七十一上外戚第七十一下外戚

第七十三文苑第七十四孝威第七十五節義第七十七酷吏

第八十九氏羌第九十西域第九十一蠕蠕第九十二

序志第三天象第四天象凡二十六卷不全者列傳

第七十二儒林第七十九術藝第八十列女凡三卷

臣攷臣恕臣燾臣祖禹謹序目錄 臣攷者劉攷也臣

恕者劉恕也臣祖禹者范祖禹也二劉與范皆長於

史學故此書攷證校它史爲精審

北齊書

廿二史攷異卅一

錢大昕學

神武帝紀

齊高祖神武皇帝

按李百藥北齊書本紀八篇列傳

四十二篇共五十卷今據世所傳本審正之惟本紀

第四

文宣帝

列傳第五

趙郡王

第八

段榮

第九

斛律

第

十

孫騰

第十一

賀拔

第十二

張瑊

第十三

高乾

封隆之

第

第

十四

李元

第十五

魏蘭根

第十六

孫季

第十七

張纂

第

第

第

第卅三

暴顯

第卅四

陽斐

第卅五

李稚

第卅六

儒林

第

第

第

第卅七

文苑

第四十二

恩倖

凡十八篇

係百藥

元本

第

第

第

第

其餘大抵取北史補足之其列傳第十八

薛琠等

第十

九

萬俟普等

第廿一

李渾等

第廿二

崔暹等

第卅二

尉瑾等

文與

北史異而無論贊第卅八

循吏傳

第卅九

酷吏傳

第四十

外戚傳

第四十一

方伎傳

亦與北史異而有序無贊似經

後人刪改或百藥書亡而以高氏小史補之乎凡紀

傳中有史臣論有贊及稱高祖世宗顯祖肅宗世祖

席號者皆李史之舊文其稱神武文襄文宣孝昭武

成者則北史之文晁公武謂百藥避唐朝名諱不書

世祖世宗之類不知承規修史在貞觀初其時世字

竝不回避李勣之名至高宗朝始去世字梁陳周書

皆不避世祖世宗字承規與思廉德棻同時何獨異其例乎蓋嘉祐校刊諸史之時此書久已殘闕而雜采它書以補之卷首神武紀卽是北史之文晁氏不加詳審遽以爲例有不一其實非也以史例言之高祖上不當係以齊字此亦沿北史之文而未及芟削者

監本卷首無齊字

鎮將遼西段長常奇神武貌謂曰君有康濟才終不徒朕便以子孫爲託 按段長龐蒼鷹二事齊書在蔡儒傳北史移入神武紀

文襄帝紀

臣等詳文襄紀其首與北史同而末多出于東魏孝靜紀其間與侯景往復書見梁書景傳其所序列尤無倫次蓋雜取之以成此書非正史也 此宋嘉祐校刊諸臣所記南監本本紀第五第七列傳第二第四第六第七第廿五第廿六第廿七卷末俱云此卷與北史同又列傳第二十卷末云此卷牽合北史而戎第廿一卷末云此卷雖非北史而無論贊疑尚非正史第廿九卷末云此傳與北史同但不序世家又無論贊疑非正史汲古閣本皆無之或明人校刊者所題也百藥修史在唐貞觀初乃南監本每卷首題云

隋太子通事舍人李百藥撰明人之無學如此

文宣帝紀

乾明元年二月丙申葬于武寧陵諡曰文宣皇帝廟號
威宗武平初又改爲文宣廟號顯祖 按乾明初上
諡號曰高祖文宣皇帝天統元年改諡景烈皇帝廟
號威宗武平元年復改顯祖文宣皇帝此紀有脫文
論曰 按百藥史論皆稱史臣曰其稱論曰者皆北史
之文也齊史八紀已亡其七惟此篇猶是百藥之舊
而論不著史臣蓋校書者依前後篇之例改之

孝昭帝紀

孝昭皇帝 此篇亦北史之文本紀例書庶號於篇首

而孝昭紀不書肅宗肅字亦無回避未審其故

皇建元年詔以故太師尉景故太師竇泰故太師太原
王婁昭故太宰章武王庫狄干故太尉段榮故太師
万俟普故司徒蔡儁故太師高乾故司徒莫多婁貸
文故太保劉貴故太保封祖裔故廣州刺史王懷十
三人配饗太祖廟庭故太師清河王岳故太宰安德
王韓軌故太宰扶風王可朱渾道元故太師高昂故
大司馬劉豐故太師万俟受洛干故太尉慕容紹宗
七人配饗世宗廟庭故太尉河東王湑相樂故司空

薛修義故太傅破六韓常三人配饗顯祖廟庭是時以文宣爲高祖此顯祖當爲高祖之誤清河王岳傳云配饗高祖此云配世宗當是傳誤蔡儁傳云贈司空此云司徒未知孰是封祖裔卽隆之也万俟卬普子受洛干高乾乾弟昂封隆之劉豐潘樂薛循義破六韓常諸傳俱失書配饗事

後主紀

武平四年殺侍中崔季舒張雕虎 儒林傳稱張雕蓋避唐廟諱此虎字後人所加或本是武字也北史儒林傳作張雕武汲古閣本虎作唐尤誤

鄭文貞公魏徵總而論之曰 百藥書當依梁陳史之
例稱史臣侍中鄭國公魏徵此卷本據北史北史成
於高宗朝故稱其諡

文襄六王傳

河南康舒王孝瑜 康舒北史作康獻

趙郡王叔傳

孝昭臨崩 百藥書例稱諸帝廟號此稱孝昭亦後人
所改

庫狄干傳

子士文嗣 按士文隋之酷吏隋史已爲立傳不應闕

入齊書蓋後人以庫狄干傳亡取北史補之而不知
限斷之例遂并士文傳牽連入之昔人云作奏雖工
宜去葛龔校書之無學其謬累至於如此

斛律金傳

留金守信都領恒雲燕朔顯六州大都督 此六州卽
神武所領六鎮兵趙郡王瑛傳所云六州大都督六
州九酋長大都督孫騰傳六州流民大都督皆此六
州也但六州之名尚少其一史有脫文蓋脫蔚州也
高祖使金統劉豐大汗步薛等 大汗步薛卽步大汗
薩也步大二字俱倒轉寫之謫菩薩字本於釋氏書

薩字不知所从蓋卽薛字聲轉爲桑割切六朝唐人碑刻薩旁無从產者而薛亦或書爲薩可證薛薩本一字唐元應一切經音義云菩薩本或作扶薛此傳步大汗薩亦作薛此古字之僅存者監本改爲薩於文雖畫一而古字日亡矣列傳有薛孤延亦代人複姓薛孤唐初人有薩孤吳仁薩孤薛孤疑卽一族

詔金第二子豐樂

豐樂本名羨而詔稱其字當特風

俗敦樸不以稱字爲嫌也齊書多稱人字如万俟受

洛干

洛

可朱渾道元

元

高乾邑

乾

高敖曹

昂

楊遵彥

情

封祖裔

隆之

高仲密

眞

邢子才

邵

段孝先

肅

王元

景昕祖孝徵璉源文宗彪李寶鼎金蘇珍之璠之類

皆上下通稱故史家因之

斛律光傳

肅國公可叱雄等 北史王雄傳賜姓可頻氏

賀拔允傳

與弟岳殺賊帥衛可肱 北史作衛可瓌瓌肱聲相近

高阿那肱傳雖作肱字世人皆稱爲瓌音此其證也

庫狄盛傳

割并州之石艾縣肆州之平寇縣原州之馬邑縣各數

十戶 按魏隋二志所載原州後爲平涼郡與馬邑

攷異

北齊書

六

相距甚遠魏志無馬邑縣隋志有馬邑郡而無馬邑縣

張保洛傳

牒舍樂武成初開府儀同三司營州刺史封漢中郡公
戰歿關中武成疑是武威之譌此段附出諸臣各
著里居不應舍樂獨殊其例當云武威人而其下尚
有脫文爾此傳旣附見舍樂事而慕容儼傳未敘尔
朱將帥歸順立功者又有武威牒舍樂名云牒舍樂
少從尔朱榮爲軍主統軍後西河領民都督尔朱兆
敗率衆歸高祖拜鎮西將軍金紫光祿大夫以都督

隸侯景破賀拔勝于穰城又與諸將討平青兗荆三
州拜鎮西將軍營州刺史天保初封漢中郡公後因
戰沒于關中史之重複不檢照如此

夷雄傳

白苟堆梁之北面重鎮梁置西淮州於白苟堆今正
陽縣地淮陰爲淮州治所故此加西

揚州刺史育寶北史本傳作是寶字文貴傳作是云
寶云育聲相近

王則傳

天平初行荊州事都督三荆二襄南雍六州軍事按

攷異

北齊書

魏收志荊州之外惟有北荊州而北荊置於武定二年則天平初未有也此三荊蓋指南荊東荊併荊州爲三隋志春陵郡後魏置南荊州西魏改爲昌州淮安郡後魏置東荊州西魏改爲淮州賀拔勝獨孤信傳所稱三荊皆指此二襄謂襄及南襄也南雍之名魏志亦不載隋志春陵郡之蔡陽縣梁置蔡陽縣後魏置南雍州是也

慕容紹宗傳

梁武帝遣其兄子貞陽侯淵明等當云貞陽侯明後人加淵字

士肅弟建中襲紹宗爵 建中北史作三藏三藏蓋建

中小字入周隋後以小字行尔

薛循義傳

薛循義 北史作修義孝昭紀亦作修義魏齊碑刻人
旁字多从彳旁故修循二文多相混

天平初除衛將軍南中郎將帶汲郡太守頓邱淮陽東
郡黎陽五郡都督 淮陽與汲郡回遠恐是濮陽之
譌北史孝靜紀天平元年初置四中郎將於礪石橋
置東中蒲泉置西中濟北置南中洛水置北中魏收
志惟云魏郡貴鄉縣有東中郎將治餘皆失書

步大汗薩傳

大安狄郡人也 北史作代郡西部人大安神武廣寧
皆六鎮改州所置之郡統言之則爲代人大率皆鮮
卑也

慕容儼傳

西荊州爲梁將曹義宗所圍 魏時荊州治穰城對東
荊而言故曰西荊

時北育太守朱帶劔謀叛 北育蓋荊州屬郡魏志荊
州領郡八有北清而無北育蓋傳寫之譌當爲北清
也此傳清去水旁

高乾傳

徙居河濟之間魏因置東冀州 按魏志不見東冀州之名

長子繼叔襲祖洛城縣侯 按乾父翼封樂城縣侯此稱洛城前後互異河間有樂城縣疑卽翼所封

高季式傳

老字安德鬲人 安德郡名非老之字蓋校書者妄加字耳

封隆之傳

隆之弟子孝琬父祖曹 按北史孝琬父興之字祖曹

以隆之字祖裔推之當以胃爲正傳失書其名尔

李元忠傳

分廣平易陽襄國南趙郡之中邱三縣爲易陽郡 此

事在永安中魏收志失載

盧文偉傳

以功授儀同三司揚州刺史鎮宜陽 揚當作陽

陳元康傳

天保元年修起居注 天保當是天平之譌

杜弼傳

竊唯道德二經闡明幽極 按老子道德五千言河上

公王弼注本皆以上篇爲道經下篇爲德經予家藏唐人石刻景龍二年本開元御注本皆分道經德經爲二後魏杜弼注老子上表亦稱道德二經賈公彥周禮疏亦引道經德經云云可證唐以前本皆有道經德經之分也

徐遠傳

刺史陸士茂詐殺室韋八百餘人 汲古閣本室作失

王紘傳

乾明元年昭帝作相 齊書例稱孝昭爲肅宗此稱昭帝亦後人妄改

平鑒傳

卽啟授征西懷州刺史 征西下富有脫文

韋子粲傳

諧與粲俱入國粲富貴之後遂特棄道諧 道諧于粲
皆二名不當單舉一字且與上下文例不一蓋傳寫
脫落也

元坦傳

齊天保初 此係齊史不當著齊字此卷屢見齊字蓋
後人采北史以補齊書之闕偶未芟削尔

元弼字輔宗魏司空之子 弼乃暉業之父終於魏朝

不當闕入齊史更不當列于暉業之後此由校書之人無學徒知擄摭北史而不顧先後之倒置也又攷北史弼字邕明不字輔宗其父鬱亦未爲司空或諸元別有仕齊名弼者而後人妄牽合之

元韶傳

元韶字世曹 當云彭城王勰之孫

贊曰元氏蕃熾憑茲慶靈道隨終運命偶淫刑 此卷

惟存贊語十六字傳文與論俱亡後人以北史補之

李繪傳

未幾遂通急就章 汲古閣本脫去三百餘字誤以高

攷異

北齊書

上

隆之傳文儼入又文宣紀末亦脫去一葉詞意不屬
當從監本

李璵傳

子詮韞誦 按北史敘傳璵子詮詮弟謚謚弟誦誦弟
世韞詮字世良謚字世安誦字世業則世韞當亦以
字行者傳先載謚一人又以韞爲誦兄皆不若北史
之可信傳載韞與陸令萱女弟私通得授太子舍人
誦以女妻穆提婆子超遷臨漳令北史皆沒而不書
非實錄也

高德政傳

汝兄如虎 此虎字後人追改

王昕傳

邢邵後見世宗 此傳稱廟號或是齊書元文弟晞傳
則全是北史亦無論贊

王琳傳

乃遣使奉表詣齊 此篇乃後人取南史足成故多外
齊之詞

蕭明傳

封須陽侯 須當作渚卽貞陽也北史無蕭明傳此篇
當是百藥元文自蕭祇以下皆以北史補入

裴讓之傳

裴讓之字士禮 按裴讓之張宴之陸印王松年辛術

傳皆不著本貫郡縣蓋校書者但知寫北史以補足
卷數而不及檢其先世郡望幾於智昏菽麥矣

邢邵傳

靈太后令曰 按太昌之世靈太后歿已久矣此傳本
出於北史而北史文亦脫落誤以李崇傳雜入其實
子才初無請立明堂事也

祖挺傳

范陽道人也 道當作迺汲古閣本作狄道尤誤

暴顯傳

遣與步汗薩慕容儼等 步汗薩卽步大汗薩也

與梁泰州刺史嚴超達 秦當作秦

從攝口入江 攝當作攝

盧叔武傳

盧叔武 北史作叔彪唐人諱虎史家多改爲武亦有作彪者此人蓋名叔虎也

袁聿修傳

出除信州刺史卽其本鄉也 按隋志淮陽郡項城縣

東魏置揚州及丹楊郡梁改曰殷州東魏又改北揚

攷異

北齊書

州後齊改信州聿修陳郡人故稱本鄉

未曾受升酒之饋 升當作升卽斗字

李稚廉傳

除濟陰郡守帶西兗州刺史 西兗州治濟陰郡

儒林傳

齊時儒士罕傳尚書之業徐遵明兼通之遵明受業于

屯留王總傳授浮陽李周仁及渤海張文敬及李鉉

權會竝鄭康成所注非古文也下里諸生略不見孔

氏注解 按魏晉以後經學莫盛於北方鄭康成易

書詩三禮惟河北諸儒篤信而固守之小王之易僞

孔之尚書雖風行江左不能傳於河朔春秋亦宗服
子慎故當時有寧道周孔誤諱言鄭服非之諺見唐書元
行沖傳隋世河間信都二劉兼通南北學唐初諸儒多
出二劉之門由是撰定正義以王易孔書杜春秋列
諸學官而鄭服之義亡矣

文苑傳

樊遜 未若龍駕虎服 此虎字後人追改下文彤獸
畫龍之獸亦本虎也校書者又不能改

顏之推 非社稷之能衛 此下脫一句監本有小字
汪童汪錡三字

攷異

北齊書

古

昵狄牙而亂起，狄牙卽易牙。

寔未改于弦望，遂□□□□及都□而昇降。諸本

俱闕六字。

次曰敏楚，敏當作愍，卽愍字之推。又有子名游秦，蓋入周後所生。

睦豫，廣韻睦字下不云又姓，它書亦未見睦姓者，狀諸本皆从目旁。

酷吏傳

邸珍，從高祖起義，此傳稱高祖不稱神武，疑百藥書止存序及邸珍一篇，宋游道以下取北史補之。